

洛甯縣志卷之七

政事部

學校

家塾黨庠術序古皆掌其事於鄉大夫至國廼有學之名漢文翁修學宮於西蜀武帝令天下郡國皆立學官而縣之有學則自宋始我

朝崇經重道凡山陬海澨及新拓邊陲罔不興學立教廣厲人材矧洛甯為殷周畿地庠序遺澤猶存而沐浴

聖代菁莪棫樸之化百有餘年文教更蒸蒸日上感乎近者制科倣分年窮經法以取士師儒所訓迪士子所觀摩功尤亟焉邑廟學肇於宋修於明至康熙年間賢宰佟君鼎新之置禮樂器數猶輝煌金門洛水間起哀舉廢功為首推楫不敏承乏於茲殿廡宮牆曾加修葺今夏傷於積霖丹堊黝昧周墉彫削規畫而重新焉不敢後也

洛賓儒學在縣治西李通志宋咸平中知縣李穀建崇甯四年知縣夏琦重修元末燬於兵明洪武六年知縣翟禮重建三十年主簿艾敬增建永樂元年知縣郝敬修正統十年知縣于淵修宏治六年知縣李景修王通志萬歷二年知縣秦紳修明季寇燬國朝順治九年知縣程萬善重建舊志康熙二十八年知縣佟賦偉自修

大成殿東西兩廡戟門櫺星門教化無窮坊東西兩門復修

崇聖宮明倫堂新製禮器犧尊一象尊一雲雷尊二簋六十豆六十簋一簋一祝版一盃一樂器編鍾編磬各一琴瑟簫管一鳳簫笙各二壎篪各二應鼓一鼗鼓一祝敔各一麾一旌一簣翟各三十六額設佾禮生六十四人每歲春秋之祭歌者四人鍾磬應鼓祝敔麾旌各一人琴瑟簫管鳳簫笙壎篪各二人舞三十二人執事皆以諸生習禮儀者為之頗稱明備後人慎於藏護亦時加修補今將建修歲月今昔碑記錄以備考

重修廟學碑記

洛甯邑佟侯少年作宰慕古循吏之風以愛民革弊為本母于譽則志乎介母梯榮則訓乎禮勉勉焉為懼治之不立學之不實也既三年諸務漸以次舉爰惕學宮之頽圯閭里之無光乃與鄉先生及博士諸弟子議力主重建而任其成煥然從新金碧照耀閭邑為之色起而御眾適以旅次得與拜瞻不覺喟然敬服蓋尊聖之道興學之功於斯篤矣越日侯及博士諸弟子咸來具幣以請俾御眾一言以記意欲以明學也顧鄙陋何足與此雖然嘗聞之矣昔河汾謁夫子之廟而嘆曰大哉乎君君臣臣父子兄弟夫婦夫婦夫子之力也斯言也後之尊夫子者無以加矣後之學夫子者亦無以加矣二十年來堯舜相傳之道至今坦如大路則知愛敬序別之發於人倫者抑亦夫人生而性具之善耳是以孟子願學孔子道性善言必稱堯舜而錫山高中憲曰稱堯舜者性善之象也是可取而訓也但人有之而不自

知必視乎教教之聚其業則才斯興惟視乎學學之非有加於愛敬序別之外驚於高遠奇絕之行也亦惟復其所性生而善者云爾而子貢昔謂夫子之牆數仞不得其門而入不見宗廟之美百官之富又曰得其門者或寡矣此又何以說也慨自司徒樂正之官廢小學蒙養之教衰浸淫至於詞章功令之習流離難返父以是望之子矣師以是傳之弟矣靜言以思又如之何其為入門而見宗廟百官之美富也是故誦聖人之言而不見諸行是徒誦也行聖人之行而不體諸心猶冥行也況孔門論學首重為仁先儒窮理亦曰居敬雖言各人殊要皆從事身心歸宿聖域所以古之六藝蘊發德行大而實達而有徵斯三物所以重賓興之典也與嗚乎明乎上者成教明乎下者成風又聞之曰古之學也存乎人今之學也存乎天則今日侯之殫心建學俾諸生修業相將日新其於風也可與幾矣豈非天之所與一其志而相其成耶則存乎人者固知必有所在而不可以外求也謹浣筆而為之記康

熙二十八年歲次己巳上浣之吉趙御眾撰

重修廟學碑記

洛甯自前庚辰遭罹冠賊燬燒廬舍魁及學宮灰燼之餘棟摧檻折五十年未尺葺丈補備官者無敢闕春秋祀事云爾歲乙丑予膺命來宰茲邑拜瞻之下見其土剝木蠹惕然而切宮墻之慮然而固陋既不可以支久更新又恐難以圖終往來於心者三年次丁卯乃謀於邑之鄉先生及博士諸弟子力圖重建咸曰宮墻之光也風教之本我邑人獲率趨焉即夙夜其何敢後僉謀既協爰卜吉日興厥功而助金者魚魚也助材者魚魚也若梓人陶人圻人是鳩是庀平值匠作咸罔弗動於役載木輦石奔輳疊疊乃視其飲食獎以犒賚俾無飢渴在官經始於丁卯十月迄己巳二月遂落成焉其為工也聖殿之楹五東廡楹二十一西如之若戟門若櫺星門楹各三前綽楔而高榭者為大成坊外其壁若梁憲直南門而表秩者為教化無窮坊若洞扉

選睇角如砥赤堵左右如矢拾級而進穆然以深上棟下宇為甍為榱角為
爐為榮為疏及礎金碧為錯彩之為梁為塗為填斧鑿灰泥繩墨拱拱俱稱
新構其次則有檢擇遺材而增新之者殿之東曰啟聖祠也楹三闢門西曰
明倫堂也楹三闢重門皆綠垣以甍有統購新材而重建之者戟門之西曰
鄉賢祠也啟聖之後曰名宦祠也明倫堂之前曰進德齋修業齋也鄉賢祠
之前則宰殺堂也各三楹焉於是合築屏牆而周繚之學宮之規制庶幾備
矣嗚乎艱哉余於是重有感也前乎此者持重於始基後乎此者視成於勿
壞則今日之幸底厥功在予雖總其事而鄉先生暨博士諸弟子咸相與信
心協力一似乎聲相應氣相求者即興廢有時豈不曰苟或為之必見其成
哉易曰知至至之可與幾也知終終之可與存義也諸士勉乎哉向其進德
修業以為朝廷養士之報則今巍然煥然之家乃人文勃然蔚然之機也
況諸士手薊松裁爭相灌植其所以沐聖化於時雨拔壯志於青雲者予不

能不有厚望焉謹記其始末歲月以俟後之來者得以考云其總費若干工若干督工而始終者某某書助者宜書爵書名別鑿石以傳之康熙二十八年歲次己巳二月日知縣佟賦偉撰

重修洛甯儒學碑記

洛甯儒學之修也自康熙三十四年一見之越茲六十餘稔司鐸屢更棟宇蕭然其間傾者廢者攘攫而缺者折毀而為爨桐者不知凡幾嗟乎翰署之設鞠為茂草其何以興厥職率多士乎方今

天子右文崇儒重道慎選經明行修之員俾董學校所以正學術端風化責綦重也今年春太邱任君果以明通秉永鐸方將整飭士習振興文教進諸生而啟迪之而明倫堂及衡齋三十餘間俱已摧敗零落幾無一椽可蔽風雨雖欲講道論德無由也乃聞於上官募衿士之有力者共勦義舉銖積寸累僅得白金四十餘金而所費已五倍之任君乃毅然捐貲轉貸自為補

直將作之屬必躬督之無苟無怠於是堂構聿新軒厨畫一門楹棖桷繪垣甬道靡不周固向之傾者起廢者舉缺者補毀者完將垂永久而未易頽敗也而或且議之世之視官衙如傳舍者率多苟且塗飾聊以容膝若不能一朝夕居比比皆是任君為此為子孫計乎抑為後人計乎余應之曰否否不然也我國家勸勵官箴首以實心實力為兢兢服官之始而苟焉從事一事苟則其餘皆苟官有尊卑理無二致向使籌及後謀及孫子固知其有不能為也知其不為而為之者有以知任君之大有為也豈僅一儒學謂足盡其才哉余前謁選京師即聞任君名仰企久之後乃倦遊嵩華主講洛西而任君適來目擊而心壯之因誌其梗概用以覘任君之所學并以勗後來之職斯鐸者是為記張東鈞撰

文廟春秋二丁祭禮儀

一前期二日承祭各官均在本衙門致齋二日齋宿於外

一前期二日用白紙糊板黃紙錄邊墨書祝文本學教官具補服親捧祝板禮生前導送至

正殿中案上安設一跪三叩首退

一前期一日承祭各官具蟒袍補服監視宰牲併座毛血贊禮生引承祭官詣

正殿視祝板上香一跪三叩頭退立兩廡親視演禮

一正祭日五鼓各官朝服齊集入戟門內贊禮生引各官至臺階下立唱執事者各司其事分獻官就位陪祭官就位承祭官就位贊禮唱啟戶啟牲饌蓋迎

神唱神降恭神各官俱行三跪九叩首禮興贊禮唱行奠帛初獻禮引承祭官詣盥洗所盥洗淨巾詣酒尊所司尊者舉觶酌酒司帛者奉帛詣

至聖先師孔子神位前跪唱奠帛獻帛唱奠爵獻爵叩首興唱詣讀祝位跪眾

官皆跪讀祝文畢叩首興贊禮唱分獻禮詣

復聖顏子位前唱跪奠帛奠爵叩首興次詣

宗聖曾子位前次詣

述聖子思子位前次詣

亞聖孟子位前奠帛獻爵俱如前儀其

十二哲兩廡分獻官奠帛奠爵俱照承祭官行禮唱復位承祭官分獻官

各復位立贊禮唱行亞獻禮唱詣酒尊所執爵陞

壇如初獻儀唱復位承祭官分獻官各復位立贊禮唱行終獻禮唱詣酒尊

所執爵陞

壇如亞獻儀唱詣飲福受胙位跪眾官皆跪飲福酒受福胙三叩首皆興復

位贊禮唱送

神承祭官陪祭官分獻官俱行三跪九叩首禮興贊禮唱

神去徹饌司尊者捧尊司帛者捧帛各詣燎所唱詣望燎位焚祝帛望燎復位
唱閣戶禮畢撤班各退

崇聖祠禮儀

一正祭日贊禮生引承祭各官俱朝服先祭

後殿詣

肇聖王

裕聖王

詔聖王

昌聖王

啟聖王位前奠帛獻爵讀祝俱如前殿儀行三跪九叩首禮分獻詣

先賢顏氏

先賢曾氏

先賢孔氏

先賢孟孫氏位前奠帛獻爵亦如前殿四配儀亞獻終獻如初獻儀送神復行三跪九叩首禮興贊禮唱捧祝捧爵各恭詣燎所唱詣望燎位焚祝帛望燎復位禮畢各退

乾隆九年奉部頒發祭

至聖先師祝文

維乾隆

年歲次

月朔越

日

某府

某縣

某官致祭於

至聖先師孔子曰惟

先師德隆千聖道冠百王揭日月以常行自生民所未有屬

文教昌明之會正禮和樂節之時辟雍鐘鼓咸恪薦於馨香泮水膠庠益致嚴於遵豆茲當仲秋祗率桑章肅展微忱聿將祀典

復聖顏子

宗聖曾子

述聖子思子

亞聖孟子配尚

饗

乾隆九年奉部頒發祭

後殿五王祝文

維乾隆

年

月朔越

日

某府

某縣

某官致

祭於

肇聖王

裕聖王

詒聖王

昌聖王

啟聖王曰惟

王奕葉鍾祥光開聖緒聖德之後積久彌昌凡聲教所覃敷皆循源而溯本宜
肅明禮之典用申守土之忱茲屆仲春肅將祀典配以

先賢顏氏

先賢曾氏

先賢孔氏

先賢孟孫氏尚

饗

文廟兩廡位次謹遵

會典錄列於後

正殿

至聖先師孔子神位 正中向南

四配

復聖顏子名回字淵魯人

述聖子思子名伋字子思

在殿內東傍西向

宗聖曾子名參字子輿魯武城人

亞聖孟子名軻字子輿鄒邑人

在殿內西傍東向

十二哲

先賢閔子名損字子騫魯人伯牛之族

先賢冉子名雍字子弓魯人

先賢端木子名賜字子貢衛人

先賢仲子 名由字 子路魯之卞人

先賢卜子 名商字 子夏衛人

先賢有子 名若字 子若魯人

有殿內次東旁西向

先賢冉子 名耕字 伯牛魯人

先賢宰子 名子字 子我魯人

先賢冉子 名求字 子有仲弓之族

先賢言子 名偃字 子游吳人

先賢顓孫子 名師字 子張陳人

先賢朱子 名熹字 元晦號晦庵婺源人

在殿內次西旁東向

東廡

先賢蘧瑗 字伯玉

先賢澹臺滅明 字子羽 魯武城人

先賢原憲 字子思 魯人

先賢南宮适 字子容 一作紹魯孟懿子之兄

先賢商瞿 字子木 魯人

先賢漆雕開 字子若 一作憑字子開 蔡人

先賢司馬耕 字伯牛 宋人

先賢有若 字子若 家語字子有 魯人 此照 府志重載

先賢巫馬施 字子期 陳人

先賢顏辛 字子柳 魯人

先賢曹邴 字子循 蔡人

先賢公孫龍 字子石 家語作公孫寵 衛人